



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :



Tir Yimyim



tirymyim@aolima



tir yimyim

TAPAK 10

Modi-i linük yimsüsütsü
metemsü: Mamata

Carolina Marin All England
Championships nung masayatsü

VOL. XVIII NO. 151 (ADOK 151) DIMAPUR

SANGTENNÜ (TUESDAY)

METSÜREMI (MARCH) 16, 2021 ₹ 5.00

COVID-19 Nagaland: Nisung 14 anepaludar

Kohima, March 15 (TYO): Nagaland nung anogo ana atongtepa COVID-19 puteter mesüra taneptsü angur ka danga maliasü.

"Tanü nisung shinga dak-a COVID-19 aliba meputet aser taneptsü angur-a maliasü" ta Health & Family Welfare Minister S Pangnyu Phom-i metetdaksü.

Nisung 12,255 rongnungi 11,966 taneptsü nguogo aser tang nisung 14 anepaludar, ta paisa ashi.

Nagaland nung COVID-19 nungi taneptsü angubaji 97.6% lir ta Health & Family Welfare Director, Dr Denis Hangsing-ia

metetdaksü.

COVID-19 puteter nisung 91 asüba nungi parnok 10 bo tanga timtem ajanga asü. Nisung 154 tashi tanga state temi ogo, ta paisa ashi.

Tang anepalurtem rongnung nisung 13 Kohima nung aser ka Mokokchung nung lir, ta Dr Hangsing-isa shisem.

Nagaland nung COVID-19 alitsü akok ta temolung melemi bilemba sample 1,33,942 tendangogo. RT-PCR ajanga 75,257, TrueNat ajanga 37,476 aser Rapid Antigen Test ajanga 21,209 tendang, ta paisa metetdaksü.

NOTA votes timba ngura election result magitsüla

New Delhi, March 15 (Agencies): Election mapang constituency ka nung NOTA vote timba süra iba election result ji magii polling tanaben asütsüla ta ken o benokba atema Supreme Court-i Centre aser Election Commission dang nungi telangzüba meshiogo.

Chief Justice S A Bobde-i anir Justice A S Bopanna aser Justice V Ramasubramanian nungertem bench-i Ministry of Law and Justice aser Election Commission of India nem tetuyuba agütsü.

Hombarnü Supreme Court nung iba onük angadangdang ken o benoker atema jembitsür Senior

advocate Maneka Guruswamy aden. Advocate aser BJP lennir Ashwini Kumar Upadhyay-i iba ken o benok aser pai Election Commission dang NOTA votes timba anguba ajanga result agienba candidate aser political party tem tanaben polling agidang medendaksütsüla ta shiogo.

"NOTA votes timba anguba ajanga candidate tem tanaben polling nung medendaksüba aser candidate tasen ka shimba ajanga nübor nem tashi agütsütsü. Nübertemi candidate dak temolung masüba lira NOTA (none of the above) agütsütsü" ta Upadhyay-isa ashi.

Longleng - Dimapur night bus tsükok; nisung 9 yiru



Mokokchung, March 15 (TYO): March 15 nikongdang 3:00 ako meta Longleng - Dimapur senzüba 'Blue Hill' night bus Orangkong yim anasa tsükok aser iba lendong nung nisung 9 yiru, parnok rongnung nisung anabo kanga mejungi yirur Mokokchung District Hospital bushia yokogo, ta Longleng SDPO, Impung Chang den iba osangbeneri jembidang ashi.

Orangkong yim ya Longleng nungi kilometer 3 shi dang pilar

lir. Iba blue hill travel (NL 07B 0121)-ji kanga mejungi raksaogo. Bus nung mena alir passenger-tem ajak temang anepalutsü atema District Hospital Longleng-i anir ogo, ta SDPO-isa ashi.

Mezüng bushisüngdangba mapang iba bus ya 'brake' meshitakba (brake fail) ajanga atalok amai bilemer, ta SDPO-isa ashi. "Bus-ji len kalen tugua tsüokba ajanga tia ajung, ashila, len küboki alu asübo koda mesüla", ta paisa shisem.

AASU-i March 20nüCAA anema lungkak aittsü

Guwahati, March 15 (Agencies): All Assam students' Union (AASU)-i March 20, 2021 nü CAA (Citizenship Amendment Act) anema state ajungalen lungkak aittsü osang metetdaksüogo.

"March 20 nü AASU züngsemtemi CAA anema lungkak

aitba nung shilem agitsü. Iba sentong ya Assam ajungalen ayonga agitsü" ta AASU president Dipanka Nath-i ashi.

AASU züngsemtemi state kübok tesem ajungalen bike rally tem agitsü ta paisa ashi.

(Maneni tapak 2 nung...)

Dimapur nung bank nung inyakertemi lungkak aiter



Dimapur, March 15 (TYO): Hombarnü United Forum of Bank Union (UFBU) kübok Nagaland state unit-ia State Bank of India Regional Business office, Super market anasa lungkak aitogo.

UFBU ya bank telok 9 külemi lokteper tentetba lir aser parnoki anogo ananü- March 15 aser 16 linük ajungalen lungkak aittsü ayongzü.

Centre sorkari public sector bank tem privatize asütsü anema aser banking inyakyim nung temelenshitsu kar asütsü takhangba agüja UFBU-i lungkak aiter.

"Onoki privatization anema menokdakra, iba ajanga loktiliba nung nübertem aser sensakertemi tetsükdaksü ajurutsü. Anungji public sector banks tashi itdaksütsü atema

inyakba nung pusema nungittsü mepishhir" ta All India Bank Officer's Confederation, state secretary, Nagaland state unit aser State Bank of India Officers' Association, president, NE circle, T.A.P. Paul-i ashi.

Tanü Dimapur nung banking services nung tetsükdaksü kanga ajuruogo kechiyong bank nung mapa inyaker aikati lungkak aitba nung shilem agi.

Petrol litre nung Rs 33; Diesel nung Rs 32 aazüker: Centre

New Delhi, March 15 (Agencies): Hombarnü tashi nung India nung anogo 16 buba tashi petrol aser diesel jenjang tasaküba liaka, tanü Parliament nung

Centre-i totzü nung excise duty, cess aser surcharge ajanga sen aika aazüker ta metetdaksüogo.

May 6, 2020 nungi Centre-i central excise duty ama petrol litre shia nung Rs 33 aser diesel litre shia nung Rs 32 aazüker. Iba nung basic excise duty, cess aser surcharge dena lir ta tanü Parliament nung metetdaksü.

March aser May 5, 2020 tsüngda Centre sorkari petrol litre nung Rs 23 aser diesel litre nung 19 tajangzü.

January 1, 2020 aser March 13, 2020 tsüngda Centre-i petrol litre nung Rs 20 aser diesel litre nung Rs 16 ngua liasü.

Iba tetezü ya January 1, 2020 den medemdangra, Centre-i petrol litre nung Rs s 13 aser diesel litre nung Rs 16 tashi aazüka liasü.

State 5 nung assembly election agitsü lia Centre-i totzü jenjang kanga ajungketba atema nisungtemi aittsür. Külen, Opposition-ia Centre dang totzü jenjang ajema makümba atema ashishiteper.

"Yimya agi India nung petroleum products ya tanga linüktem den tasakba/dalangba asür. Iba ya inyakyim balala ajanga lir aser item nung tax maparen aser pei pei sorkartemi subsidy agütsüba dena lir. Item osangji Centre-i mayur" ta Hombarnü Lok Sabha, MoS Finance Anurag Thakur-i ashi.

"Tanü linük senotsü tensa nung ajemdaker infrastructure

aser tanga terenlok mapa balala inyaksü atema excise duty jenjang tasak agitsüba akümer" ta paisa metetdaksü.

Ajisüaka, totzü company temi hopta ana jungnüa totzü jenjang memelenshiba atema Centre sorkari ola madoker.

Shitakba agibo India nung totzü jenjang ya global crude oil jenjang den medemdanga anogoshia reprangshia aruogo.

Totzü jenjang tesüsabuba reprangshimbaji February 27, 2021 nü liasü aser iba anogo petrol litre nung poisa 24 aser diesel litre nung poisa 15 ajungketa liasü.

CENTRE-STATE TSÜNGDA TAX LEMSAR:

Taküm February ita Rajasthan aser Madhya Pradesh state tem nung petrol litre nung Rs 100 adena liasü. India kübok iba state ana nung totzü nung VAT timtiba agir.

Centre aser state sorkartemi petrol litre shia nung 60% aser diesel litre shia nung 54% tax agir. Nisung kati petrol litre nung Rs 100 agütsü idak nung jagi Centre keti Rs 33 aoer. Kasaji diesel litre nung Rs 100 agi yokra Centre keti Rs 32 aoer.

Totzü jenjang nung state sorkartemi ola madokteter kechiyong parnokia pei pei state sasep nung tax agiba den ano Centre sorkari benendenba nungi cess aser surcharge medenei 42% lemezüker. Iba ya Finance Commission-i latettsüba inyakyim ka lir.

GST LIST NUNG TOTZÜ DENDAKTSÜTSÜ SENTONG MALI:

GST list nung totzü

dendaksüba agi dang India nung totzü jenjang ajemtsü ta mongintemi ashir, saka Centre aser state sorkari ibaji inyaksü memolunger.

GST kübok totzü dendaksütsü atema tasüngdangba ka langzüdag "Indian Constitution Article 366 nung 'Goods and Services Tax' ta asüba ya alcoholic liquor supply asüba nung tax agiba dak alia goods mesüra services nung tax agiba lir. Anungji GST kübok petroleum products madener" ta Anurag Thakur-i ashi.

"Ajisüaka, Constitution nung Article 279 A (5) ajanga Goods and Service Tax Council-i petroleum crude, high-speed diesel, motor spirit (petrol), natural gas aser aviation turbine fuel (ATF) nung goods and services tax agitsü atema anogo shimsü akok ta shia lir" ta MoS Finance Thakur-isa metetdaksü.

"GST Council-i ashiba sülen ang GST list nung petroleum products dendaksütsü akok" ta finance minister-isa shisem.

"Tang tashi nung GST Council-i GST kübok petroleum products dendaksütsü atema shia mali. Council-i revenue nung tetsükdaksü ajuruba densema tanga maparen ajak shisadangba sülen petroleum products GST kübok dendaksütsü atema telemtetba agitsü akok" ta paisa ashi.

"Tang tashi nungbo, GST kübok crude petroleum, petrol, diesel, ATF aser natural gas dendaksütsü onük kecha mali. Tanga by-products ajak GST kübok dena lir" ta MoS Finance Anurag Thakur-isa metetdaksü.

Dimapur nung APC ajanga sensaksemba sentong ka ayongzük



Dimapur, Metsüremi/March 15 (TYO): Agriculture Production Commissioner ajanga Hotel Saramati nung Hombarnü Entrepreneurs tem den Naturally Nagaland products indang sensaksemba sentong ka ayongzük lia sü.

Agriculture Production Commissioner, Y Kikheto Sema-i ashiba agi, Naturally Nagaland ya state nung aluyimer aser entrepreneur temi

pei sasa züsentetba aser yanglutetba osettem danga state nung Nagaland Handloom and Handicraft Development Corporation aser emporium ajanga Kolkata aser New Delhi nung yokyayokchiba nung yaritsü asoshi yangluba sentong ka lir.

Iba sentong nung mapang indoka shisadangba sülen Nagaland nung adokba aser yanglutetba osettem dangalen

bener oa ayoktsü, jenjang atettsü, quality management, belenshitsü aser logistic support atema committee ka tenteta liasü, koba Naturally Nagaland kübok inyaksangshitsü.

Iba committee nung Ikuto Zhimomi, CEO, Nagaland State Agriculture Marketing Board ya tayonger asütsü, Holohon Yephthomi, Deputy Secretary, Agriculture ya member secretary aser ano züngsem pongu alitsü.

Kohima District Planning and Development Board senden menogo

Dimapur, Metsüremi/March 15 (TYO): Kohima District Planning and Development Board pur March 2021 atema senden DPDB indang Conference Hall, Kohima nung March 15, 2021 nü mena liasü. Iba senden nung Vice Chairman DPDB aser Deputy Commissioner, Kohima, Gregory Thejawellie, NCS menden liasü, kong Advisor, Urban Development and Municipal Affairs, Neikiesalie Nicky Kire aser MLA Keneizhakho Nakhro na dena liasü.

Taoba senden nung Jotsoma Nature Conservation Eco Tourism (JNCET) indang benoka jembiba ama Area Administration Officer den Forest Department aser dangartemi verification report agütsüba nung ajemdaker

sorkar dangi abentsü iba senden nung lemtet.

Society registration onük nung Nagaland Optometrist Association, Secretariat Road; Universal Health Coverage Nagaland, Directorate of H&FW; Nagaland Taekwondo Association, Rüziezou P. Khel Kohima Village aser Benevolent Accord Society Rüsoma nungi teshimtet nübutemi parnok inyaksangshi aser nükjidong lemsatepa liasü.

House-i iba onük nung tatsü-talang ajak asadanga jembiba sülen District Screening Committee ajanga sayuba ama aser society shiai lenla balala nung abensa inyakba nung ajemdaker sorkari dangi aben.

Taoba senden nung Kigwema High School ya Higher Secondary School (Science Stream) kumdaktsütsü onük benokba nung ajemdaker

District Education Officer, Kohima, Neizetuonuo ajanga verification osang agütsü aser upgradation asütsü atema nüngdakba document ajak abensa lir, ta ashi.

Iba dak sendakba nung DPDB züngsemtemi pei tangatetba lemsatep aser iba onük busema nokdak aser ano maneni Government school tem nung Science stream tali amenoktsüla, ta ashi aser maneni nüngdakba meratem agütsü asoshi sorkar dangi yok.

District Project Officer, Land Resources, Dr. Menuosietuo Tseikha ajanga senden nung department inyaksangshi indang PowerPoint presentation agütsü aser taruba DPDB senden nung PHED (Urban) nem par department inyaksangshi lemsateptsü nungloktsü.

AASU-i March 20 nü CAA anema...

"Nisung ajak dang aser talisa yimtsüng nung alirtem dang BJP sorkari ozüng tesashi yangluba CAA indang osang metetdaksütsü alizüng nung iba sentong ayonger. Onoki ajak dang CAA ya Assam maitsü aser sobaliba atema lendong lir ta sangoktsütsü" ta Nath-isa metetdaksü.

"BJP-i aniba Assam sorkari 2016 Assam Assembly election matongdang nangzükba aika meinyak" ta Hombarnü AASU president Dipanka Nath-isa tai tongloktsü.

Assam Assembly election indang mezüngbuba shilem agütsü hopta ka dang lia March 20 nü CAA anema sentong tulu

agütsü.

Külem, Assam Congress-ia CAA anema noktakba ajanga sorkar akümtsü tashi angutsü meranger.

Assam Congress-i sorkar akümtsü tashi angu nungbo CAA mapa küma meinyaktsü atema ozüng ka yanglutsü ta nangzükogo.

(TAPAK1NUNGI...)



Alima ajunga den külemi March 15, 2021 nü Kohima Law College nung World Consumer Rights Day amungba mapang Nagaland Voluntary Consumer Organisation tir, Kezhokhoto Savi den o jembirtem aser Kohima Law College nung azüngertem külemi tangokba noksa ka yangi angur. Taküm alima ajunga nung World Consumer Rights Day ya 'Tackling Plastic Pollution' omen nung ajemdaker munga liasü, aser Kohima Law College nunga Kohima Law College, Nagaland Voluntary Consumers' Organisation (NVCO) aser Association of Kohima Municipal Wards Panchayat (AKMWO) lungjemer iba anogomung munga liasü.

Dimapur nung mejangjaba nisung tasü mang ka nguteta lir

Dimapur, Metsüremi/March 15 (TYO): New Flyover, Dimapur teküboklen March 15, 2021 nü mejangjaba tetsür (Naga nunger masü arishi küm 35 - 40 shi) tasü mang ka nguteta liasü.

Iba nisungba ya shiranga asüba südi, ta temolung melemteti lir. Ozüng agi melaba

ama maparen ajak tembangba sülen iba tasü mang ya PM examination/jangjatettsü asoshi District Hospital Dimapur-i bener ogo.

Kibur/kinunger/tembartemi Officer-in-Charge, GRPS, Dimapur den tongteprateptsü mepishir, ta sangdong ka ajanga ashi.

PAC senden thinener: Commissioner & Secretary, NLA

Dimapur, Metsüremi/March 15 (TYO): Advisor, School Education aser Public Accounts Committee, Nagaland Legislative Assembly indang mendenpuba, K.T. Sukhalu-i Public Accounts Committee, 2021-2022 indang senden March 17, 18 aser 19 anogotem amentsü aliba April 20, 21 aser 22, 2021 anogotem amentsü thinenogo, ta

Commissioner & Secretary NLA, Dr. P.J. Antony ajanga sangdong ka nung metetdaksü.

Iba dak sendakba nung osang tejangja mapangtong nung metetdaksütsü.

Committee züngsemtem aser Department balala indang Officer temi iba temelenshi ya metetjema alitsü mepishir, ta sangdong ajanga ashi.

CTN nung World Consumer Rights Day mungogo



Dimapur, Metsüremi/March 15 (TYO): Changtongya Town kübok GA Rest House Changtongya Town nung March 15, 2021 nü World Consumer Right Day munga liasü. Iba sentong ya Changtongya Multi Purpose Co-Operative Society Ltd. aser Department of Legal Metrology & Consumer Protection, Kohima lungjemer ayongzükba liasü.

Sentong nung onük jembir Moakumzuk Tzudir, SDO (C) Changtongya ajanga World Consumer Rights Day amungba

tetetzü aser consumer temeden indang jembia liasü. Iba mapang, Consumer Protection Act 2019 kübok linük nung sorkari consumer ajunga wazükba ayur, ta ashi aser consumer right indang awareness nüburtem nem angatetdaksütsü ayongzükba liasü.

Iba sentong nung Y.N. Alem, Secretary MPSC Ltd Changtongya menden liasü aser paisa tarur pela agizükba o jembia aser O.Purlemba, Chairman MPSC Ltd Changtongya ajanga tepela ankep o jembia liasü.

JNV, Kohima nung study material lema agütsü

Dimapur, Metsüremi/March 15 (TYO): Vigyan Jyoti Scheme kübok Jawahar Navodaya Vidyalaya, Kohima nung tetsür kaketshir nem study material lema agütsüba sentong ka March 13, 2021 nü agia liasü, kong EAC (Sadar), Kohima, Kevingoto Kulnu, NCS ya tongti tesemdanger aser Moasangla, Associate Professor, Kohima Science College ya shisalen sayur ama dena liasü.

Vigyan Jyoti Scheme ya Department of Science and Technology, Government of India ajanga high school nung marks tajung anguba tetsür kaketshirtem Science, Technology, Engineering and Mathematics (STEM) azüngtsü asoshi ajungmesotsü nükjidong nung tenzükba lir, ta Principal, JNV, Kohima, K. Kapfo-i ashi. Paisa kaketshirtem dang meranga azüngtsü aser study material ya tajungtiba nung amshitsü ajungshia liasü.

Tetsür kaketshirtem dang science agütsü ajungshiba mapang, tetsür aikati science

agiba ngua pelar, ta shisalen sayur Moasangla-i ashi aser kakets reju aika nung tetsür timba lir, ta shia liasü.

Laisa kaketshirtem dang research agiba yimya sübaa tasü dangbatem asü dangtsü ajungshi aser pei azüngba nung technology timi amshitsü shia liasü.

Laisa mathematics aser science ya subject tasak ta angatetba tai kumtsütsü shia liasü.

Sorkari lapokba rejutem nung azüngba kaketshirtem ya tia taka ta züngshitsüla, kechiaser item kakets reju nung tesayur, facility aser maangka tajungtiba angur, ta tongti tesemdanger Kevingoto Kulnu-i ashi.

Tetsür nem tashi temeden asoshi education ya hadir tajung ka lir aser nisung ka education anguba ajanga tashi angur, ta pai ashi.

Administrator ka ama inyakba mapang ajangshibatem den medemdanga pai kaketshirtem ayongzükba liasü.

Arunachal nung online power bill agütsütsü atema App sayaogo



Arunachal Pradesh CM Pema Khandu-i Namsai nung online power bill payment application sayadang agiba noksa angur. Noksa nungsa Deputy CM Chowna Mein angur. (Itanagar, March 15)

Itanagar, March 15 (Agencies): Online ajanga Electricity Bill agütsütsü atema Hombarnü Arunachal Pradesh sorkari mobile application ka sayaogo.

"Arunachal Power Pay" ta nüngja agütsüba mobile application ya State nung revenue indang inyakyim digitize asütsü nükjidong nung Power Department-i iba

sentong mapa kuma inyakogo. Namsai nung deputy chief minister Chowna Mein aser local MLA Zingnu Chau na lia Arunachal Pradesh chief minister Pema Khandu-i iba mobile application saya liasü.

Kasa mapang chief minister-i Arunachal Power Pay amshia pa indang Power bill agütsüba osang Twitter nung sangdongogo.

"Tanü Arunachal Power Pay mobile app ajanga ni atsükba Power bill agütsüogo. Revenue bendenba maparen digitize sütsütsü atema iba app ya power department indang mapatong ka lir. Deputy chief minister Chowna Mein aser MLA Zingnu Chau na matsüngdang iba app sayaogo," ta Pema Khandu-i ashi.

Consumer rights meteta alitsüla: Conrad Sangma

Shillong, March 15 (Agencies): Hombarnü "World Consumer Rights Day" amongdang Meghalaya chief minister Conrad Sangma-i state nung alir nüburtem dang consumer ama pei temeten meteta amshitsüla ta ayongzük.

Service provider balalai ashioktsüba maparen inyakba nungi nüburtem kümzüka yutsütsü aser consumer rights indang temeten meteta lidaktsütsü asoshi alima tesem ajunga nung "World Consumer Rights Day" amonger.

Taküm "World Consumer

Rights Day" atema omenji "Tackling plastic pollution" lir. "Tan World Consumer Rights Day nung aseni asenok saka asen temeten meteta aser itemji tim nung amshidi," ta Conrad-i lemsatop.

Advertisement, audio-visual campaign aser consumer education tool tem ajanga consumer rights dak sendakba nung kümdangshia aser meteta lidaktsütsü asoshi Union consumer affairs ministry-i "Jago Grahak Jago" (Wake up consumers, be aware) campaign sentong tenzüksü.

Taküm World Consumer Day indang omen - "Tackling plastic pollution" nung ajemdaker, ministry ajanga nüburtem dang tzü mopung menentsüba non-biodegradable plastic agi yangluba yangkhutem mamshitsü atema ayongzükogo.

Consumer Affairs Ministry-i, iba campaign ajanga nübur tali kümdangshitsü asoshi ajungmesotsü aser asen meketa aliba libajen nung tulu tila ajak jangratema alitsü asoshi consumer tem atsüa arutsü.

BJP züngsemtemi Congress tanishir dak azük

Guwahati, March 15 (Agencies): Assam kübo Golaghat nung Congress tanishir ka BJP züngsemtemi azük.

Golaghat kübok Khumtai constituency nung news channel ka atema o atsütepba sentong nung iba ya atalok.

BJP züngsemtemi Congress tanishir dak azükba video ka

social media nung kanga prokshir.


Iba video nungji BJP züngsemtemi Congress tanishir dang o tamajung ashiba aser teka sangshiba lir.

BJP züngsemtemji Khumtai nungi BJP MLA Mrinal Saikia den yaritepertem lir ta osang angazüker.

Arunachal Pradesh

Advocate General Nilay Dutta-i iba tatalokba aitsüogo.

"Assam Chief Electoral Officer-i Model Code of Conduct ta ajaba kulikaket mazüng asü? Iba ozüng benoktsübaji pa mapa masü na? Ni pa junga meteta lir aser iba jagi tan election nung mapa junga inyaktsü ta imlaa liasü" ta Nilay Dutta-i ashi.



Manipur Chief Minister N Biren Singh-i Hombarnü mapatong 311 tenzüksüogo aser ano mapatong 39 inyaktsü atema lung azüngtsüogo. Manipur state sorkar küm pezü abensaba tenüng nung CM Biren Singh-i department 28 nung Rs.1,096.05 crore endoka yangluba mapatong 311 sayatsü. Ano, paisa department 8 nung Rs. 278.77 crore endoka yanglutsüba mapatong 39 indang lung azüngtsü. (Imphal, March 15)

NLFB-i BJP nem vote meinoktsütsü ayongzüker

Guwahati, March 15 (Agencies): M Batha-i anir tentetba telok tasen National Liberation Front of Boroland (NLFB)-i Assam nung assembly election magidang ola adokogo.

NLFB-i yashi video ka sayaba nung nübortem dang BJP nem vote meinoktsütsü atema ayongzükogo.

"India aser Assam sorkartemi mapa inyaktsü memolungba ajanga onoki iba telemtetba agiogo. Onoki asen temeten atema inyaktsü aser raratsü. Anungji tanü (12/10/2020) onoki National Liberation Front of Boroland ta ser telok tasen ka tentetogo" ta M Batha-i metetdaksü.

Onoki Bodoland state balaka kümtettsü atema inyaktsü, ta paisa ashi.

Batha-i aniba telungpur teloki Council elections sülen tanaben telungi aitsü ta osang angazüker.

"Batha-i anir nisung 30 shi ka aremi iogo aser parnoki

prangpong tajungtem bona lir" ta Special DGP (TAP) & BTR nung ADGP in-charge LR Bishnoi,

B Saoraigwra, Govinda Basumatary, Ranjan Daimary aser Dhirendra Boro nungertemi aniba NDFB telok pezüi January 2020 nung Centre den Bodo accord nung sign sütepegogo.

October 3, 1986 nü Bodo Security Force (BSF) ta tenüng jateter tentet aser Accord nung sign asüba NDFB telok pezü lokaogo. 1994 küm 'NDFB' ta tenüng melen.

January ita Accord nung sign asüba sülen Batha dena telungpur tanishir aika temai adok. Ajisüaka, Accord nung temolung masüba agi parnok kar aremi meyipa iogo.

"Bodoland People's Front (BPF) party nung dena aliba züngsemtem BJP party-i reshikangshir" ta taoba BTC mendenbuba Hagrama Mohilary-i tai tonglokttsüogo.

India Book of Records nung Cachar district züngokogo



India Book of Records nung Cachar district züngokogo

Guwahati, March 15, 2021 (Agencies): Assembly elections 2021 atema Assam state renemba mapang ka nung voter awareness dak sendakba nung Rangoli talangtiba yanglutetba atema India Book of Records nung Cachar district züngokogo.

Dalu lenmang nung kilometer 8 talang Rangoli yanglutsü atema Honibar nikongdang 5:00 ako nungi tenzüka liasü aser ghonda 24 tsünga iba maparen tembang. Dalu ya East-West Corridor (Mahasadak) tatemlen lir.

Systematic Voters' Education and Electoral Participation (SVEEP) campaign shilem ama Cachar district administration ajanga Rangoli yanglutsü sentong renem.

Osang angazükba agi, India Book of Records nungi 'official observer' Jitendra Kumar Jain matsüngdang iba record yanglua liasü.

Iba Rangoli takok ngua yangluba sülen "India nung iba lenmang nung yangluba rangoli ya talangtiba" ta Jain-i kuli agütsü.

Iba ama maparen ya India nung mezüng asütsü, ta paisa ashi.

"Linük tesem mashi ka nung

voter tem pei temeten meteta alitsüsa iba ama maparen inyakba kodanga mengudang. Street art category nung kilometer 8 talang lenmang nung Rangoli yangluba yagi World record-a yanglur asütsü akok, saka onoki iba maparen ya ano asadangshitsü. World record asütsüsa iba rangoli yagi ajangzüktetra onoki tekaratiba nung osang sangoktsütsü" ta Jain-isa metetdaksü.

Iba Rangoli yangluba maparen nung kaketshir tentet, süngo lu nung inyakertem, police, CRPF aser Army den Cachar deputy commissioner Keerthi Jalli nungeri shilem agiogo.

Deputy Commissioner, Keerthi Jalli-i ashiba agi, India nung Rangoli (drawing asüba) talangtiba ji kilometer 4 liasü ta ashi.

"Onok record yanglutsü atema inyakba masü aser record dang ajatettsü süra kilometer pezü ser tesadang rangoli ka jagi peritsü," ta Cachar DC-isa ashi.

"Voter aser district administration tsünga tekümdangtsü sangdongtsü aser iba mapatong nung shilem tajung agitsü ajungmesotsü atema iba ya inyaktsü shisatet" ta Jalli-isa metetdaksü.



TIR YIMYIM YIMOBILEM (EDITORIAL)

DIMAPUR SANGTENNÜ, METSÜREMI (MARCH) 16, 2021

NAGALAND NUNG TESÜNEP ALITSÜLA

Asenok Nagaland nung alir Naga nungertemi tangar bendanger, talisa tsümartem Nagaland nung aruagi senso kuma melidaktsüner, iba jagi tang ano asentenshia Nagaland nungbo ILP dang masü saka Register of Indigenous Inhabitants of Nagaland (RIIN) alitsüla ta akanger. Iba RIIN yagi Nagaland nung shibasa 1963 kum December 1 tashi nung Nagaland nung liasü, pa aser par chinurtem nem dang Nagaland senso temeten agütsütsü. Iba jagi Dimapur nungbo talisa Marwari, Bengali aser Muslim nungertem dena parnok aika Nagaland senso akümtsü aser Kohima aser Mokochung ama nunga Nepali nungertem kar Nagaland senso akümtsü. Atangji, iba jagibo Nagaland nung Naga nungertem kangabo makoksar, kechiyong itemji aliba agiang yimti nung nütsüng aika akümer aser parnokiang ano shishilembaba lenmang tapu balala ngueta bener arua inyakba agi asenok town mesüka akümer. Asenoki angatetsüba kaji, asenoki asen aliba tesemtem ya city kuma renlokner saka tangar maden asenok Naga nung kija agibo city mekümtetsü, kechiyong asenok nütsüng kanga apara. Iba tangatetba nung asenoki asen lima ya tangar bendangertem nem senso temetensa magütsüyonga asenok nungdakba mapa karbo inyaka litettsüsa mesüra aruli oli ta senzütetsüsa tensa mapang aser inyakyim junga yutettsüla. Koba lima nung shiba südir süang, tesünep nung tajangzük aketba mapa kabosa inyaka linütsü, anungji iba amaji tetsübu tarendak mali tajangzük aketba mapa ka mesüra ka inyaka melitetsüsa kumra, asenoki liang asüyonga shingaia malitsü. Iba ama tensa tia ka agi Dimapur-bo akoksadagi. Joko, sarusachi aser meinpronger tali akumba agi, Dimapur nung godown tulutem ajak Nagaland artsü adena orr Khakati nung amenok tenzükogo aser Dimapuri aruba khu abenba gari aser train-tema ajema kümdagi. Nagaland government-i tanü Nagaland nung business sademsadema meinyaktetsüsa akumba tensa tia ya yakta mazüoktetra, asenok yakta metsü mersü, süoshi aser ki oset alii artsü adena Khakati aser Bokajan leni alutsü. Iba jagi Nagaland government GST ajanga alimelen agia aliba sen ajemtsü aser Nagaland nung asenok aika mapa maka akümtsü. Iba tensa tia aremer maremtet taoba hopta nung Dimapur Chamber of Commerce & Industruy purtemi yimjak nung metetdaksüogo. Atangji, Nagaland nung, talisa Dimapur nung, telongpur, temapur aser state government kübok department tapu balalai khu bener aruba gari, godown aser dokan nung saru zünger mezüngma saruba agi asen lima timtemdaktsüba tensa tia indang ya tang dang metetdaksür masü saka taoba kum ishika nungi iba timtem indang ya lokti balalai ola adoker aser osangkakettem nunga zülur, saka shisabolutsüka, Nagaland nung iba ama ozüng alema inyakerterem azüoker mali kumogo, anungji mesarur akoksa ashi, tesarurtembo sademsadema jangratema aliba angur. Iba amaisa Nagaland ya toktsü nungbo, asenoki aika jembiyonga, Nagaland aientsüba agi Guwahati aser Imphal aientsü aser Dimapur city masü Khakati aser Bokajan city kümadoktsü. Ashiko menden nung alirtem dakbo sarusachiba timtem agi tulukabo metangshir asütsü akok, iba jagi nübortem timtem nung liaka zak ta maiter südi. Ajisüaka, kodang Nagaland nung business aser nütsüng ajema kümdir, Nagaland kongrar ta metettsüla. Idangjibo business inyaker mali government mapa inyaker ishika den saru sarur ishika anüngtsü. Iba Nagaland-ji asenoki tanü yimdangi arua bilemdangdi. Asenok ya kari mozü chidaktsür tamatarir amato, asenok jakdang ozüng raksaba mapa jenti ataloker, saka kecha hau ta mali, asenokbo mapai maoba aser mapa meinyakba sen angurji, aji agi tepelashi aser tenük tasüng. Ajisüaka, asen lima tensa mapang majungba agi nütsüng eshinba aser yimitem tilaba tilaba kuma ora, asen li aser asen kitemji jenjang maliba oset amai ka dang kümadoktsü. Iba amaji matalokdaktsütsüsa Nagaland ya ozüng shitak amshia yimsü asüba yimjung aser tesünep aliba lima ka kümdaktsütsüla.

OLEMSABANG

TEMO AKETBA NORTHEAST INDIA ALIMA WARASÜLEN ALA-ASHI KOKTETSÜYIM

S. Temjen Imchen

(Yashi adok nungi...)

Assam state indang bilemdangdi. Assam nungi – koba ali temo agi sünga lir – tanga limai aoba purtem teimtiba lir. Parnokji India lima yimti nung mapa bushia aor. Teimba ka southern states Karnataka, Kerala, Tamil Nadu; aser karbo Delhi, Mumbai, Pune leni oteper. Pei jaka doktsür tanga linükiang mapa bushia otepba yimya-yimpong ya oda loktiliba-rongsen, sobaliba aser tamangba yimsü tsütsülen tebilemtsü aliba agi ataloker ta ajiteter. Tawa terenlokba ren tasadangba ka akaba sülen, iba amai zülutsü: “Out-migration is a recent problem in Assam. Historically, Assam is a migrant receiving state due to availability of livelihood sources. But with respect to development of Assam the rate of employment generation is very low.” (See Jugal Kumar Deka, “Factors responsible for out-Migration in Assam,” *International Journal of Academic Research and Development*, Volume 4; Issue 5; September 2019; Page No. 59-63). Anungji, item bendangleni oa mapa inyaker rongnungji, India linük jaka bala nung prokshir kar kompany ki tulu yangludak, kar factories-tem nung, aser kar mills, ta item tesem aser jaka mapa inyakteper.

Ajakbo kasa nükjidong nung dangbo tanga limai maor. Migration telok nungji karbo call-centre, hospitality sector, spas, aser tanga nükjidong nung aoba ajurua arur. Ano telok karbo education, competitive exams, etc, nükjidong nung azüngtsü aser tetoktepba nung item - IAS, IPS, IFS, IAF, Army, atentsü nükjidong yur aor.

Pandemic effect aser meyipa aruba tebilemtsü

Coronavirus or Covid-19-ji kodang alima rangpen wara ta *World Health Organization* ajanga Osang agütsü, iba sülenbo alima linüktem ajonga nung – India-a dena – yimti aser jila ajonga shipangyonga (lockdown) oa tenzük. Iba lockdown osangji March ita 2020 kum nungi tenzük. Iba lockdown ozüng ajanga migrant workers aika Indian yimti aser jilatem nung marakzüteti alenpanga ayu. Iba mapang bendangleni oa mapa inyakerterem, ayangertem, tazüngertem, shishilembar rogo, mozüki aortem kija aser kibong, aser yamala mesükba nübur merijangsa-merijang timtem tuokrong jenti ajuru. Joko, tanem-tenemi India sorkari Special Trains aika south, north aser western India nungi Guwahati aser Dimapur leni yok. Central service aser regular service nung alir dak alaka, mapa inyaker rogotemji noklang nung noklang amai pei tesem aser talidaki timtemseta meyipa aruba otsü jenti lir. Yamaji Dimapur aser Guwahati train station nungia Bihar aser Jharkhand tesem aikalen sorkari Special Trains ajanga migrant workers temjia pei-pej tesemi yokba otsü lir.

Merijang aika meyipa arur külen, joko kechi koda asütsü ta asüngdangtep. Iba meyipa aruba telok nung terata (dilemma among the returnees) tuluka adok. Pei taso limai meyipa arur sünnung, kechi inyaktsü ta asüngdangtep. Ibaji koda tesüngmangtsü!!! Iba sülen, iba tasa yimdangi aru, ‘Work-and-earn in our own lands and homes.’ Atangji, meyipa shilanger (returnees) telok aser iba tatalokba ya temoatsü aser senti mapang ka südaktsütsüla ta nisung aikati bilemer. Ashiba ama, jokorla pei limai meyipa shilangertemi sorkar dak metaloktsü melena, pei-pej sasa mapa meranga inyaktsü aser pei talidak jaka aser tesem nungji rongsenren kützüng maparen renlokdaaktsütsü merangtsü aser yamaji inyaktetsüba khuret kümdi.

Covid-19 sülen North-East India nung telongjong terenlok asoshi mapang tajung ka

‘Covid-19 wara sülen tensa’ mesüra ‘post-Covid-19 scenario’ bajj mapang ana kuma lemsatsü akoker. Mezüngbuba nung, kodang NEI returnees nübur-i pei-pej tesem aser kidangi meyipa shilang, iba mapang nungi shir post-Covid tensaji asütsü. Tanabuba nung, medical scientists aser doctortemi koba mapang nung Covid-19 vaccine ngutetdir, iba mapang nungi post-Covid-19 tensa ta ajatsü akoktsü.

Alima ajunga nung iba tesashi wara agi tonger nübur timtemdakja aser taküma jenti laludaktsüba den külemi, lockdown ozüng linük aser tesem ajaklen yanglur – koba dang standard operating procedures (SOPs) iba ozüng jagi alen. SOPs-ji amshia March ita 2020 nungi tenzükba tang tashi lokti tentet ajak nung amshia odagi. Kodang returnees nübur pei ki aser tesem tonga aru, Assam lima tesem nungbo parnoki ashi – “Onoki asen jaka nung mapa bushitsü” (we will look for jobs locally).

Ali-temo aketba tesem nung joko telongjong rongsen ketzüng mapa balala nung terenlok (holistic economic growth) takoktsüyim leman kar yamai bushidangdi:

- (i) Ola-angla, kharkana/mapa inyakren züindaktsüla;
- (ii) Maneni rubber süngdong, süngo lu, aser coffee luyimba züindaktsütsüla;
- (iii) Chiyungtsü koma achayangtsü item yimya tajungba kümdaktsütsüla. Talisa, jang-o-tzü aser süngjanglijang nung tsünglurowa nungi kumzüka yutetba jaka tesadem peria akatsü nungdak.
- (iv) Chiyungtsü meraksai kumzüka yutetba (food preservation), koba ajanga nübur asoshi rongsen terenlokba nung odaktsür.
- (v) Tourism circuit amala state aser inter-state tsüngda tesendaktep tajung akatsüla; aser
- (vi) Ki-o-jen tajung aser peria akaba ajanga shishilemba-ba tajungba nung renloka odaktsür.

Agüja alibatemi takoktsü mapa aser lemanngtem lir. Temulungtetba lira, mapa ajak takoktsü!

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tennessee nung pastor, James Scott coronavirus tashidak agi asü



Pastor James Scott & Virginia Scott

March 15, 2021: Tennessee nung pastor, James Scott kinüngtsü coronavirus tashidak agi asüba sülen ghonda 24 tsüngda pa-a kasa tashidak agi süogo; par kinüngertemi, apuani na temeim otsüji tatem makai alitsü, kechiyong tena indang ministry agi nisung aika taküm nung kongshiogo, ta metetdaksü.

Pastor jala, Lotneice S. Hinton-i, "Kütsü asüba sülen tasügnü kübu-a asü. Ibaji tanga kecha masü saka Tsüngremer sentong liasü. Onoki kütsü asüba osang pa nem memetetdaksüi liasü," ta ashi.

Arrshi küm 87, James Scott ya Chattanooga nung aliba New Holy Temple Cathedral Church of God in Christ nung küm 61 tashi pastor inyaka liasü. Pa kinüngtsü arrshi küm 83, Virginia Scott tena kibong kümer küm 66 jungogo.

Scott'er semchir, Jada Smith-i, tena shirangba mapang ajak nung tena kati ka anepalutepa liasü, ta metetdaksü.

Taoba ita Church of God in Christ nung putir, Charles E. Blake-i, Scott aser pa kinüngtsü na ya Arogo nung ministry tenzükertem lir, ta metetdakja liasü.

"Tennessee Eastern Second Jurisdiction nung President ka ama Scott-i kanga pelaseta inyak aser küm 25 tashi pai tenzuka aruogo. Tanelatem kümzüker ka ama Scott-i lanurtem nungi tenzüker taintem aika Khrista dangi anir aruogo," ta Blake-i metetdaksü.

1954 küm tena kibong akümba mapang Virginia Scott arrshi küm 17 dang liasü aser James Scott arrshi küm 21 liasü. Tena meimtepba otsüji kinüngertemi kodanga mamatoktsü, ta parnokisa metetdaksü.

Smith-isa, tetsü o tebou nati küm aika Chattanooga nung timtemer kibong aika yariogo, aser tena atema mission mapaji ibaji liasü, ta ashi.

James ya 1933 küm Pickens County, Mississippi nung aso aser tanur 10 rongnung 6buba liasü. Pa arrshi küm 14 asüdang tebu asüba sülen kobi melii pai ministry mapa tenzük.

Pa lanur asüba mapang nungi pai tatishitsü tajung aika sayuogo. Lanuwa teno nung yaritsü atema pai tetsü den farm nung yaritepa aru.

Pai mapang ajak nung kijung lanurtem dang kinüngbu tajung ka aser tebu tajung ka asütsü tesayuba agüja aru. Tsüngremi agütsüba sempet amshia pai külisüba mapa inyak aser mangdang tajung yur Arogo tenzük.

Pai Tennessee kübok tesem aika nung Tenla ki aika yanglutsüogo.


Pa kinüngtsü Virginia Scott ya tanur 10 rongnung tanabuba liasü aser la lanur asüba mapang nungi lai kinüngertem, medemertem aser külem class purtem aika Khrista dangi anir aru.

Kibong nung tantsütila asünung lai teno nung ajak anepalua intetdaksü aser mapang ajak nung tetsü den yaritepa aru.

1956 küm tena Chattanooga-i ao aser Holy Temple Church of God in Christ nung adenba sülen 1957 nungi pa pastor inyaka liasü.

James Scott o kinüngtsü Virginia nati tanur pezü, semchir tenet aser tanaben semchir pezü toktsür pilaogo.

'Jesus Is King' kensep ajanga Best Christian Music Album award angu



March 15, 2021: March 14, 2021 aonung Los Angeles nung Grammy Award sentong nung 2019 küm sayaba Kanye West indang kensep 'Jesus Is King' ajanga Best Contemporary Christian Music Album award nguogo.

Iba award sentong nung Kanye West bo maliasü.

2019 küm October ita nung Kanye indang 'Jesus Is King' kensep sayaba sülen NME-i, "'Jesus Is King' nung tajung kaji nendaka inyakba aser yimjung osang sangdongba lir," ta ashi.

Grammy Award sentong nung Harry Styles, BTS, Taylor Swift, Billie Eilish, Dua Lipa, Megan Thee Stallion aser Cardi B nungeri shilem agia ken aten.

Award timba angurji Beyoncé liasü; lai award pezü angu aser tetsür/tebur kecha tebandang makai Grammy award timtiba anguba record lai yangluogo.

Ano Album Of The Year award asemen tashi angur mezüngbuba tetsür kentenerji Taylor Swift liasü aser lai 'folklore' atema award tulutiba angu.

Award sentong nungsa Brittany Howard, Coldplay nungi Chris Martin, Bruno Mars aser tangartemi kentener asürtem nem akhüm agüja shilem agi.

ANO GO ABEN TSÜNGREM DEN

KHRISTA ASOSHI TIMTEMJI TENLA TULU

"Anungji nenok rishikangshi aser timtem ajak, koba nenoki aremzüker. Item nung nenok tamang aser taremzükba asoshi Tsüngremer arogotem nung onoki nenok asoshi tejak tenteter." (I Thesalonika 1:4)

Shiangaia timtem asoshi pela mebilemer, ajaki takok mesüra konang ka asoshi dang pelar aser tajak tenteter. Saka yangi tanyar Paul aser külem tenzükertemibo Khrista asoshi rishikangshi aser timtem nung aremzükbaji tepelatsü osang ka ama züngshi. Kechiyong Kibuba asoshi timtem aremzükbaji tenla tulu ta züngshir. Adangji Thesalonika arogopurtemi aji kuli süa sayuba ngua Paul aser tenzükertemi arogopur den iba asoshi pelatepba angur. Thesalonika arogopurtemi pei ajangzüktsü asoshi mesüra maksü, timtem nung jenbutsü bilema liasü asübo Yisu Khriata doktsür lila. Khrista asoshi timtem aremba ya kecha tajangzük mali ta shir lila. Saka parnoki iba lima nung Khrista asoshi timtem maksüji tajangzük ama züngshi nung parnoki aremzüktet. Kibuba atema nai timtem, tatalaba, nüktzü tia ajurur asü? Nai aremzükra aji Kibubai pa asoshi tenla tulu ama züngshir. Kibuba matsüngdang rongsen tenlaji masü, saka taküm yimya agi tenlabaji tenla tulutiba. Khrista tenüng nung nai timtem aremogo? Tayang küpzüktsü nai aremogoma? Mezüngmeshi aremogoma? Nai tenla tulu benogo.

SARASADEM

Kibuba Yisu, nai ni asoshi timtem jenti aremogo. Ni na asoshi timtem, tejashi tatalaba item ajak aremzükba tenla ama agütsür. Amen

Covid wara mapang World Vision-i nisung million 59 yariogo

March 15, 2021: Alima nung nungi tamangba yimsü lenirtem coronavirus tashidak prok 124,000 den ayongteper World Vision-i inyakogo, ta arudang evangelical aid organization- World Vision-i alima tesem balala nung Arogo aser lenirtem den senteper nisung million 59 dak tema nem teyari agütsüogo.

2020 küm March 11 nü World Health Organization (WHO)-i COVID-19 ya wara ka, ta sangdongba sülen World Vision-i teyari agütsüba mapa tenzuka liasü.

Osangbener den jembidang World Vision indang emergency response team nung senior program manager, Erica Van Deren-i, linük aika shibangba mapang nung World Vision-ibo maneni mapa inyaka aruogo, kechiyong Tsüngremi World Vision aser staff tem nem iba wadang nungloktü, ta ashi.

Interview ka nung jembidang Deren-i, "Organization ka ama linük nung aser alima nung teyari agütsüba mapa tulutiba inyakbaji COVID-19 mapang liasü," ta ashi.

World Vision US President aser CEO, Edgar Sandoval-i, Arogotem aser pastor temi meyaritep asübo onoki tamakok ngula; Taoba mapang Ebola, HIV/AIDS aser Zika virus mapang tentetba networks nungi tamangba yimsü lenirtem 124,000 den ayongteper World Vision-i inyakogo, ta metetdaksü.

"Arogo partners-i meyaritep asübo iba mapa takok mengula. Arogoi mapa tajung inyakogo aser kiyongertem den yaritepa chiyungtsü den PPE densema tanga nüngdak oset balala lemtsüba nung yaritepogo," ta paisa metetdaksü.

United States kija nunga World Vision-i Arogo 1,300 den longjemmer inyak aser U.S. Department of Agriculture kübok Farmers to Families program nem chiyungtsü box million 3 agütsü. World Vision-isa personal protective equipment (PPE) 2.5 million units agütsü aser kibong 500,000 nem nüngdakba oset balala agüja liasü.

Yaküm Coronavirus wara tenzükba sülen mezüngbuba ita nung alima tesem balala nung aya-tzüra agi tanur 10,000 tali asüba osang United Nations-i metetdakja liasü. World Food Program-ia iba wara ajanga nisung million 270-i ayawara ajurutsü, ta metetdakja liasü.

Yaküm World Vision-i tanur million 26 dak tema yariogo. World Vision-i maneni vaccine agitsü atema ajungshiba maparen nung yaridar.

OLONG PAITEP # 5754

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										
							25			

TIPIEN		LANGTSÜNGLEN	
1. Saku	- (4)	1. Taksep	- (3)
6. Songjen	- (7)	2. Langtem	- (5)
7. Mali/Tazüng	- (4)	3. O tamendaktak	- (4)
9. Tasen apok	- (6)	4. Nütsü tebuba	- (3)
11. Songtem	- (3)	5. Anügdang tesangwa	- (3)
13. Ata liasü	- (5)	6. Apitet	- (5)
16. Tzünglu den külemi tsüker	- (3)	7. Yagi jungdaksür	- (4)
17. Aso tila	- (6)	8. Anogo semer ka	- (3)
20. Tashi maküm	- (4)	10. Tatsü	- (3)
24. Tenüng kasa jatepba	- (7)	12. Tebüur kidong aser zünga	- (4)
25. Ki yangluba oset	- (4)	14. Pela agizükba tapu ka	- (5)
		15. Tenüng atet	- (3)
		18. Mejanga onü	- (5)
		19. Talak techira	- (4)
		21. Maneni	- (3)
		22. Nübo teyi	- (3)
		23. Meshi	- (3)

OLONG PAITEP # 5753 TELANGZÜBA

TIPIEN :	LANGTSÜNGLEN :
2. Anükalem, 4. Mesak, 5. Apet,	1. Kümdang, 2. Ayak, 3. Leptep,
9. Meimtep, 11. Posü, 12. Patak,	6. Sati, 7. Yiar, 8. Sangküm, 9. Metsük,
13. Tekettsü.	10. Mazü.



AO OSHI OSANG KAKET AZÜNGBA MENÜTSÜR

Rosy-la : Hai...Atongtsü nibo Ao oshi jembiba nisung ya kangasa 'Third class & Backward' amai sempaseta repranger ajaa... Nibo Ao Milen o Tir Yimym azüngertem ya kanga sempaa bilemer-a no...!!! chia...Third Class...adii.

Narola : Ena ...Atongtsü na kechiba asen tetsü oshi yamaji sempar...??? Aotsür ka sür nai Ao oshi mejembitetra aji maaksü tulu-a ta metetang.Kidang jala-jabaso danga asen oshi agi 'oja-oba' ta ajatsü sayutsüla. Asen Ao oshi agi azüngtsü aser zülutsü jala-jabaso dang sayutsüla. English aser Nagamese oshi jembitetbaji konang-nungsang ka amai meblemstsüla. Pei tetsü oshi tarok metetba aser jembibaji konang ama bilemdi.Pei tetsü oshi mejembitetba nisungji tagidak makatsü...

Lilir: L.Kika Pongener.

TANÜBO NAI LANGZÜANG

Q. Megha-Tropiques ya ____ küm saya.

A. 2011

B. 2013

C. 2022

D. 2023

===== (Taruba adok nung onoki langzütsü)

YASHI ADOK TELANGZÜBA : Madhya Pradesh

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimym

Alep

(v) Nok agi zübo kettsüba (cut with a dao)

* Tsükchiri pa dak nok agi alep.

* Lanurtemi arem nung süng aika alep.

Alep

(v) Meyibangba (wrap)

* Lai kakat agi sempet kanga junga alep.

NAI-A YA METETTER MA?



Ukraine nung apuani ka tsüngda mapang shia mangatetep adoka temeim mekong aoba nungi kümsütsü mechi tenati ita asem atema teka nung handcuff inoker alitsü telemtetba agi. Tenati tendanga inyakba maparen ya apuani shingaia meinyakdang aser iba maparen ajanga social media sabang nung nüburtem atsüa arudar. Mapang shia tilateri nung mangatetep adoka pilatepba ajanga arishi küm 33 tain Alexandr Kudlay aser arishi küm 28 tain Viktoria Pustovitova nati Valentine's Day anogomung nung tenaprongla teka nung handcuff inoker alitsü lemtet aser tenati tendanga maparen ya social media nung prokshi. Anepongi külemi saka, dokan len ljalilyong senzua aser web nung külemi menteper surf süa apuani ya ita ka tashi mepilai arudar. Reuters sangdong ka ajanga angazükba agi, apuani inyakyim ajanga Instagram sabang nung follower tasen meyisa meyi atsüa aruogo aser local talk show balala nunga tenati shilem agiogo.

SUDOKU # 5795

2		8	6	4				3	9	1	8	2	4	6	5	7
5	3	6	9				7	2	5	8	6	7	1	4	3	9
	4	9	2				1	7	4	6	3	5	9	1	2	8
7					3	6		1	2	4	5	8	6	7	9	3
2			5		8			6	8	3	4	9	7	2	1	5
6		7		3				9	7	5	1	3	2	8	6	4
				2	8	5		8	1	7	9	6	3	5	4	2
8							3	5	6	9	2	4	8	3	7	1
5	3	1	7		2		6	4	3	2	7	1	5	9	8	6

TELANGZUBA # 5794

OJANG LUTEP # 5341

MTYII	:	
SBAÜIJI	:	
TBUAMR	:	
SÜMA	:	
ABLIJA	:	
AT	:	
JAKAI	:	
ETEMETR	:	
ENBKÜLO	:	
ATESASP	:	

OJANG LUTEP TELANGZÜBA # 5340

KAKETSHIR AJAKI MERANGA AZÜNGER AJISÜAKA
TEKOLOK TECHIRABAI MEZÜNG JENJANG TONGTETER

TAN HOPTA ATEMA - KOMA SÜLA ?

Q. Municipal aser Town Council nung tetsürtem menden asoshi menden 33% shiteta yutsütsü melena political party shia 33% tetsür candidate shim nunga koma süla?

Olong 20 shi nung March 19, 2021 tashi nung iba telangzüba ya onok dangi (e-mail - tiryimym@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzübatemji taruba Honibarnü adoktsütsü.

Modi-i linük yimsüsütsü metemsü: Mamata



Purulia district, March 15, 2021: Hombarnü Purulia district nung West Bengal Chief Minister aser TMC tongti, Mamata Banerjee-i election nüboyim sentong ka nung jembidang tangokba noksa nung angur.

New Delhi, March 15 (Agencies): BJP aija Hombarnü West Bengal Chief Minister aser Trinamool Congress (TMC) tongti lenir, Mamata Banerjee-i, la anema asalentong balala yangluaka lai taruba assembly election atema nüboyimbaji kecha agia menokdangtetsü, ta ashi.

Tawa Nandigram nung election nüboyim sentong ka nung la tetsüing, tapubang aser tekong yirua liasü, aser iba dak sendakba nung lai iba o ya jembir.

Hombarnü Purulia district

nung election nüboyim sentong nung jembidang Mamata Banerjee-i, mejangjaba nisung pezü pungu kati la yirutsü aser la anema asalentong tamajung aika yangludat, ta ashi.

Nandigram nung yiruba sülen tang mezüing nüboyim sentong nung jembidang Mamata-i, lai ola adoktetba mapang tashi aser la temelungjang agi mapa inyakba tashi lai maneni raratsü, ta ashi.

"Anogo ishika ata-a liang, kü tetsüing tajungba akümtsü. Bengal nunger li nung nenok

sadem-sadema senzütettsü asü masüar ni repranga atatsü," ta lai ashi.

BJP tamakok ngudaktsütsü, ta shia Mamata-i, "Nenoki (BJP) Bengal nung takok mangutsü, kechiyong ozü sorkari küm 10 yimsüsüba mapang nung state atema terenlok mapa jenti inyakogo," ta metetdaktsü.

"Onoki inyakba ama alima nung sorkar shingai meinyaktet. Parnok (BJP) Ato kilonseri linük yimsü mesüteter aser metemsü," ta lai ashi.

Batla House ken o nung Ariz nem tasüba temerenshi obendang agütsü

New Delhi, March 15 (Agencies): 2008 küm Batla House ken o nung Hombarnü Delhi Court kati Ariz Khan aitsü aser pa nem tasüba temerenshi agütsütsü obendang agütsüogo.

2008 küm September 19 nü Delhi kübok Jamia Nagar nung Police inspector, Mohan Chand Sharma tepsetba aser tanga aibelen ken o balala nung Ariz Khan aitsü.

Khan ya kiralongrar telok-Indian Mujahideen den tesendaktep lir, ta shia police-i court dang pa nem tasüba temerenshi obendang agüjang, kechiyong iba ken o ya nisung

tepsetba dang masü saka ozüing benokba officer ka tepsetba ken o lir, ta takhangba agüja liasü.

Police-i ashiba agi, Batla House nungji tangar nisung pezü den Ariz Khan liasü aser aser kasa tatalokba nung Indian Mujahideen kiralongrar ana khaset aser aika pua liasü.

Tamalen kiralongrartem südi ta melung melemi bilemba nisung ana- Atif Ameen aser Mohammad Sajid na khaset aser melung melemi bilemba nisung ana - Mohammad Saif aser Zeeshan na pua liasü.

2008 küm September 13 nü

Delhi nung bomb pongu pokdakja lendong agütsüba mapang nung nisung 30 poksetba aser 100 dak tema yiruba sülen hopta ka dang lirbo Batla House nung police inspector tepset.

Kasa ken o nung 2013 küm trial court kati Indian Mujahideen kiralongrar, Shahzad Ahmed taküm piyong tepuokdak ayutsü obendang agüja liasü. Iba sülen pai trial court obendang anema High Court nung temepishiba ken o ka agütsü, ajisüaka temepishiba ken oji tang tashi mangadang.



March 15, 2021 nü New Delhi nung linük tatong Tir, Venkaiah Naidu aser Inter-Parliamentary Union (IPU) Tir, H. E. Duarte Pacheco na senden amendang tangokba noksa nung angur.

Rajnath-i aluyimertem aser sorkar na senden amentsü ajungshi

New Delhi, Metsüremi/ March 15 (Agencies): Hombarnü BJP office ketdangpurtem senden nung jembidang Defence Minister, Rajnath Singh-i longkak aiter aluyimertem aser Centre sorkar na tsüingda ken o jembitsü ajungshi; paisa arrtsülen China den raraba aser Ram tekülem ki yangluba onük süoka jembi.

Aluyimertemi aluyimba ozüing tasen asem anema longkak aitba dak sendakba nung BJP leniri, "BJP-i aluyimertem income anasü kümtsütsü atema inyaker, aser kechi südir süaka MSP manentsü," ta metetdaktsü.

Uttar Pradesh BJP executive committee senden nung jembidang pai, "Asenok ajak aluyimertem kibongtem lir aser aluyimba jenjang tajungba akümtsü atema onoki ozüingtem yanglushitsü melunga dang lir," ta ashi.

Paisa BJP nung grassroots workers shilem metetdaktsüdang, party nung telemsa madokba party ji BJP dang lir, ta metetdaktsü.

Tawa Ayodhya nung Ram tekülem ki yanglu tenzükbä dak sendakba nung pai, "Kodangsa election arudir BJP lenirtemi

Ram tekülem ki yanglutsü atema jembir, ta nisungtemi aija aruogo. Ayodhya nung kiojen chirepba (Babri Masjid) mapang nung Uttar Pradesh nung BJP sorkar liasü aser Kalyan Singh chief minister inyaka liasü. Ram tekülem ki atema foundation lung azüingba mapang nunga UP nung BJP sorkar lir aser Yogi chief minister lir," ta ashi.

Yaküm Ladakh nung China den raraba dak sendakba nung pai, "Asen sepaitemi aremzükbä den külemi tasütait tanela sayuogo. Asenoki shinga anema meinyakner saka asen li rakzüksü merangra asenoki ibajibo magizüktettsü," ta ashi.

India ya alima nung tashi tulu aliba linük ka akümtsü, aser ibaji shingai menokdangtetsü, ta Union Minister-isa metetdaktsü.

2022 küm UP Assembly elections nungbo BJP-i 2017 küm election dang nungi menden timba nung takok angutsü, ta pai ashi.

Iba senden nung Uttar Pradesh chief minister Yogi Adityanath, deputy Chief minister ana- Keshav Prasad Maurya aser Dinesh Sharma na aser UP BJP Tir, Swatantra Dev Singh nunger den lenirtem aika dena liasü.



March 15, 2021 nü Jabalpur nung Bharatiya Kisan Union (BKU) lenir, Rakesh Tikait-i road Show ka nung shilem agiba noksa nung angur.

Juvenile Justice Act yanglushitsü atema Lok Sabha nung Bill ka benok

New Delhi, Metsüremi/ March 15 (Agencies): Juvenile Justice (Care and Protection of Children) Act 2015 ozüing yanglushitsü atema Hombarnü (March 15) Lok Sabha nung Bill ka benokogo; Iba Act tasenba ajanga district magistrates aser additional district magistrates nem ano shilem tuluba agütsütsü atema iba bill benokogo.

Iba Bill benokli Congress MP, Shashi Tharoor-i iba bill ashishia liasü, ajisüaka Women & Child Development Minister, Smriti Irani-i Tharoor-i benokba onüktemji magizük.

Tesülen Juvenile Justice (Care and Protection of Children) Amendment Bill, 2021 ji voice vote ajanga benoka liasü.

Cabinet telemtetba nung ajemdaker, iba Act benoka inyakba agency tem inyakyim mita reprangtsü atema district shia nung district magistrate aser additional district magistrate ajak nem tashi agütsütsü.

District child protection unit-a district magistrate kübok inyaktsü. Taoba ita Cabinet senden

nung ozüing tasenbaji benoktsü atema agizüka liasü. Child welfare committee züingsem ka meshimdang pa/la libaliro aser educational qualification densema lenla balala nungi tama asadangtsü, iba sülen ang temsüa alirtem shimtsü.

Child welfare committee nung züingsemtemji health, shisaliok mesüra welfare mapatem nung tajemba agia küm tenetbosa tenzükdanga alirtem ang shimtsü mesüra child psychology mesüra psychiatry mesüra law mesüra social work mesüra sociology mesüra human development nung degree ngua alirtem dang shimtsü atema Bill tasenba nung benoka lir.

Iba committee nung züingsemtemi committee senden nung ita asem tashi medenra mesüra küm ka nung committee senden balala nung shilem pezüsü nungi shilem asemsü tashi nung medenra parnok anema bushisüngdangba sülen state sorkari züingsem nungi anentsütsü atema Bill nung benoka lir.

Myanmar longkak aitdak security forces temi injang khaloktsü



Myanmar nung mitkartemi sorkar atsüngdokba anema Thingangyun, Yangon nung longkak aiter ka dak sepaitemi injang agi akaba sülen nisung kari yirur alisang bener aoba mapang tangokba noksa ka yangi angur. Tang tashinung Myanmar mitkar yimsüsüba anema longkak aiter civilian 140 dak tema takum samaogo.

Yangon, Metsüremi/March 15 (Agencies):

Yangon yimti nung China-i senotsü agüja lapokdaksüba factory kar nung mi senlokja longkak aiter ter dak tema khasetba sülen Hombarnüa Myanmar security forces temi democracy busema longkak aiter dak injang khalokja nisung trok khaset, ta osang balala ajanga ashi.

Pua aliba lenir Aung San Suu Kyi busemertem maneni Mandalay, Myingyan aser Aunglan densema yimti-yimtong balala nung jaja, kong police temi injang khaloktsü, ta osang ajanga ashi.

"Tetsür ka dak tekolak nung khashi aser tebur ka dak tejak nung akha. Tang ni atsüka lir," ta Myingyan nung longkak aiter arishi küm 18 tain kati telephone ajanga osangbener dang ashi.

Myingyan nung nisung asem aser Aunglan nung nisung ana tepset, ta Myanmar Now osang ajanga ashi, aser Mandalay nung nisung ka khaset, ta yangji aliba osangbener kati ashi.

Ketdangsürtemi ashiba mangai longkak aitertem yimtong nung jaja, kong mitkartemi tashi tali amshia Deobarnü nisung ter dak tema tepseta liasü, koba February 1 nü mitkartemi sorkar atsüngdokba sülen azüdokshiba anogo tamajungtiba liasü.

Deobarnü ki-o-jen raksatsüba mechi China-i longkak aiter anema jembia liasü, kong nisung aikati China yagi mitkartem busemer ama ajir.

China-i sen indoka aliba factory 32 nung sen million \$37 jenjang ki-o-jen raksatsüogo aser China nung mapa inyaker ana yiru, ta China indang Global Times osangkaket

ajanga ashi.

"China nung company aser China nungertem indang taküm aser rongsen kumzüksü asoshi Myanmar ketdangsürtemi tapet aser tejangja mera agitsü imlar," ta foreign ministry odongtar Zhao Lijian-i Beijing nungi ashi.

Myanmar atsüa arutsü asoshi mapang talangka nungi China den toktepa aruba linük, Japan-i tensa asadanger aser rongsenketsüing tesendaktep tsütsü telangzüba agütsütsü bilemba mapang lir, ta ashi.

Deobarnü azüdokshi ya Yangon kübok Hlaingthaya nung tamajungba atalok, kong China meyong factory balala nung ki-o-jen raksatsüba sülen security forces temi longkak aiter nisung 37 tepseta liasü.

Danga tesemtem nunga nisung 16 tepset aser police-a ka asü, ta rights group Assistance Association for Political Prisoners (AAPP) ajanga ashi.

Yangon kübok Hlaingthaya aser danga district tem aser Mandalay tesem kar nung martial law benoka lir, ta osangtem ajanga ashi.

Tang tesüsa asüba ajanga longkak aitba nung asür ajak senteper nisung 140 shi alitsü, ta AAPP aser osang balala ajanga ashir.

Iba rongrongshirong indang osang ajemdaksütsü mechi telecom service agütsür dang linük ajunga nung mobile data shibangtsütsü totuyuba agütsü.

Suu Kyi'er teloki takok anguba November 8 election nung ashikülak mapa inyak, ta tai tongloktsüba sülen sorkar atsüngdok, ta mitkartemi ashir. Parnoki election tasen agitsü nangzük, saka anogo lateta mali.

Sorkar atsüngdokba sülen

Suu Kyi ya pua lir aser la anema ken o kar benoka lir, aser item rongnung ozüing alema bendang lima nungi walkie-talkie radio tem bener aruba aser coronavirus protocol nung aibelenba densema lir. Ano ozüing alema senotsü agizükba ken o ka taoba hopta benoka liasü.

La ya ano maneni Hombarnüa virtual court hearing ka nung nokdaksü liasü saka internet majungba ajanga video conference magiteti ken o ya mejembitet, ta la okatsür Khin Maung Zaw-i osangbener dang ashi. Ken o ya March 24 nü jembitsü, ta pai ashi.

Pua aliba Nobel Peace Prize angur tenüing nung junior lawyer ana dang nokdaksü melatsü, ta ketdangsürtemi Khin Maung Zaw nem osang agütsü.

Anüolen linüktemi Suu Kyi chioktsü akhanger aser azüdokshi aitsür aser Asia nung kidanger linüktemi mangatetep bentetratetba nung yaritsü lemsateper, saka Myanmar nung bendanger teyari magizükba otsü talang lir.

United Nations human rights investigator on Myanmar, Tom Andrews ajanga UN züngsem linüktem dang mitkar nem senotsü aser nok-o-nü agütsüba anentsü ajungshi.

"Mitkar lenirtemi yimsü asütsü malang, parnok tepuokdak ayutsü langa lir," ta pai Twitter nung ashi.

Myanmar nung ethnic minority indang telungpur telok tejentiba, Karen National Union, shirnoki küm aika rarayonga aruba sülen 2012 küm yimjung tezüngzüktep yanglua liasü, parnokia Deobarnü azüdokshi aitsü aser longkak aiter busemer, ta sangdong.

Korea nung nisung timba nem vaccine agütsütsü sentong yanglur

Seoul, Metsüremi/March 15 (Agencies):

South Korea-i Hombarnü tanabuba quarter nung vaccine agütsüba inyakyim atsülangshitsü sentong aliba metetdaksüo, kong June ita tashi nungbo nütsünyongsük million 52 nungi quarter ka shi nem vaccine agütsütsü sentong aliba nung tantsür tambur, health workers aser yakbang nung inyakerem timba bendenloktsü asameyangdar.

April ita nungi tenzüka arishi küm 65 aser temapur, healthcare worker, police, fire official, sepaitem aser flight attendant tem talila bendenloka vaccine agütsütsü, ta Korea Disease Control and Prevention Agency (KDCA)-i ashi.

South Korea nung lendong nung aliba medical workers aser kanga mejungi shiranga alirtem nem February ita nungi vaccine agütsü tenzük.

"Küm tesadang tashi nungbo nisung million 12 nem vaccine agütsütsü onok sentong lir," ta KDCA director Jeong Eun-kyeong-i ashi.

"Onoki lendong nung aliba teloktem dak rangloker inyaksü aser iba den school aser day care tem nung tashidak menatempa aoba nokdangtsü aser lokti nung tongti shilem agiba health aser medical workers timba nem vaccine agütsütsü," ta paisa

ashi.

June tashi nungbo South Korea-i vaccine million 18 dak tema agizüktsü, kong taoba ita agizükba vaccine million 1.7 densema lir, ta Jeong-i ashi.

Ajisüaka ketdangsertemi mezüngbuba quarter nung vaccine agütsütsü sentong aliba shilem 40 agi ajemtsütsüsa aküm, kechiyong taoba ita arishi küm 65 tema purtem dak AstraZeneca indang vaccine magütsüi atatsüsa aküm. Iba vaccine dak sendakba nung clinical trial data peria mali ta shia khen atema sota ata, ajisüaka South Korea nung ketdangsertemi taoba hopta AstraZeneca vaccine tantsür tamburtem nem agütsütsü temelaba agütsüogo.

Deobarnü tashi nung vaccine agizüker shilem 95 nem AstraZeneca vaccine agütsüogo asre tanungba nisungtem nem Pfizer vaccine agütsüogo, ta KDCA-i ashi.

Sorkari nisung million 79 atema vaccine mekazükogo. Paroki Pfizer, Novavax, Moderna, Johnson & Johnson aser COVAX global distribution scheme nungi vaccine alizükogo.

KDCA-i Deobarnü nisung 382 dak tashidak potetba sangdongba sülen tashidak menar 96,017 jungogo aser tang tashi nung nisung 1,675 süogo.

Lisem/awi yipur agi China kanga mejugi kongshi

Beijing, Metsüremi/March 15 (Agencies):

Hombarnü China yimtiba aser linük anüdoctip tsütsü tesem aika lisem/awi yipur agi kanga mejungi kongshiogo aser iba ajanga tayimtsü noklang aika athitsüsa aküm. Küm ter tsüingda tang lisem yipur tesashiba agi China kongshilir lir.

Hombarnü Beijing nung anüing tonga yanglur aliba kitem awi aser lisem agi sübanger mongui aküm. Yipru ajanga gari senzügenpong nung kanga mejungi kongshi aser mopung tesashi aonba den tesangwa peri melei akümba ajanga linük yimtiba kübok international airport ana nung tatimtsü 400 dak tema athitsüsa aküm.

National Meteorological Center-i Hombarnü ashiba agi, iba yipru ya Mongolia teyongtsülen Gobi lisem lima nung tenzük, kong school tem shibangtsü ajungshiba den lisem/awi nungi jenbotsü atema bus service talila bendenloktsüogo.

Metsü tsüngküm mapang

iba amala yipru kanga bulua arur aser yipur ajanga Japan adodoklen tip tashi kongshir.

Süngtong aser süngsem aika atemba ajanga kümtem tsüingda linük nung tanga tesemtem nung yipru aitba tajemba kümogo, saka yimti aser industry tem atsülangshiba den mining aser shiruru tali chimba ajanga China ajunga nung tzü-mopung dak kongshiogo.

Covid-19 koba lah aser tanga arem shiruru nungi prokshi asütsü ta amanger iba ama lisem yipru mapang shia adokba ajanga tzü mopung akhümtsübuttsü nenshir, ta China Biodiversity Conservation and Green Development Foundation secretary general Zhou Jinfeng-i ashi.

"Wara den iba yipru ajanga asenok yimya melenshitsü tangazükba tulu agütsür," ta Zhou-i ashi.

National Meteorological Center-i, lisem aser awi ajanga Xinjiang nungi tenzüka northeast nung Heilongjiang aser anüdoklen Tianjin yimti tashi kongshitsü ta takzüogo.

Dimapur nung kitsük-kirong lendong atalok



Dimapur, Metsüremi/March 15, 2021 (TYO): Honibar (13.03.2021) anepongi 02:54 ako meta NAPTC, Chümoukedima tesem nung kitsük kirong lendong adokba osanga angazüka, Duty Commander SI Francis Seiminlal Singsit-i anir Fire Station Chümoukedima nungi Chümoukedima Fire & Emergency Services team kati mi lendong ya azüoktsü asoshi iba tesem jagi aritepa ao.

Fire Tenders gari ana nung osettem teperi bener miabenertem (Fire Personnels) iba tesem jagi oa mi remseptsü tenzü. Iba lendong nung 'katcha' ki ana den kidang aliba oset ajak rondok. Iba kitsük kirong lendong nung sen lakh 4 alang osettsüset tem rondokadok. Mapang shitak nung osang agütsütepa aser fire department jeretperaba ajanga mi lendong azüokteta aser temüket nung aliba

osettsüset tem den külemi mibenertem iba tesem jai oa iba merok mi remsepteta liasü.

Maneni, tanga sangdong ka ajanga angazükba agi, Hombar anepongi 12:36 ako meta Kacharigaon, Industrial Estate colony, Dimapur nung kitsük-kirong lendong atalok. Osang angazükli dang, iba kitsük kirong lendong azüoktsü asoshi Fire Station Dimapur (West) nungi Duty Commander SI M. Martin Miasalhou lenisüba kübok Fire & Emergency Services team ka iba tesem tonga ao. Fire Tenders den mi remsep dang amshiba osettsüset aser mibenertem iba mi lendong tamajungba modaktsüi azüokteta liasü. Iba mi lendong yagi Süng arangba Mill (Saw Mill) den külemi ki ka nung tera kongshia liasü, kong sen lakh 2 alang osettsüset tem meküzmükteti rondokadok. Mapang shitak nung osang agüja aser fire department jeretperaba ajanga iba kitsük kirong lendong tamajungba modaktsüi azüokteta aser sen lakh 20 alang osettsüset tem küzmüktet. Iba kitsük kirong lendong ya electrical short circuit ajanga adok ama temulung melemi bilemer saka iba mi lendong nung nisung yiruba mesüra taküm samaba osang mali ta angazükogo.

kiojentem iba mi lendong nungi küzmüktet.

Fire Team-i minute 30 tashi nung iba mi remseptet. Iba kitsük kirong lendong ya electrical short circuit ajanga adok ta temulung melemi bilemer, saka tiaka iba mi lendong nung nisung yiruba mesüra tasüba osang mali. Fire Team-i NAPTC, Chümoukedima tesem nung mi lendong there was no casualty. The response team was led by Duty Commander SI Francis Seiminlal Singsit.

Kasa anogo nikongdang 02:16 ako meta Bethel Baptist School, 4th Mile, Dimapur anasa arem ka nung merok mi lendong atalok. Merok aoba osang angazüka Fire Station Chümoukedima nungi Duty Commander SI Kenyuyhun Kent-i anir Fire & Emergency Services team ka iba tesem jagi ao. Fire Tenders gari aser mi remsep dang amshiba

TEPELA TASOBA ANOGO

Nüngsanglemla Lkr (Mongsenyimti)

Otsü! Na tanü tashi onok den aliba ya koda temoatsü. Anogo shia nü temeim aser menürem den nü kensü ola tajung agi onok peladaktsür. Na tanü arrshi küm 99 ajungba anogo nung onoki Tsüngrem nem tenüngsang agütsür aser maneni anema aliba taküm moajang ta onoki sarasademtsür.

-Temeim semchirtem



MENUNGRA BILEMTETER

ASÜR CHUBAMAONG AIER

Kodanga amatsü makokba temeim kinungbo/obala, na onok nungi pilar tanü (16th March 2021), küm ka abensadang onoki nü temeim mapa tajungtem bilemteta menungraseta sarasadema amonger.

- Temeim kinungtsü, jala jabaso & kinungtertem



17 Buba

ONGPANGKONG WATSÜ MUNG DANG

Sentong

Anogo : 19th March 2021
Tesentepdak : Town Hall Mokokchung



Omen : "Putusen Den Jangyu Medem"

Tongti O jembir : Wt. Dr. Lanurenla Assistant Professor, Fazl Ali College, Mokokchung
Mungdang Choir : Alibatsür Telongjem Mokokchung Town

KETDANGPURTEM

Mendenbula : Wt. Talichula, Ungma
Menden yarila : Wt. Akümchila, Longmisa
Tezülula : Wt. Nüngsangtula, Kupza
Tezülula yarila : Wt. Imodangla, Mangmetong
Sentong I
Mapang : 10: 00 Am
Menden : Ketdangpur
Asür bilemtetba mapang : Wt. Shilula, Associate Pastor Women (MTBA)
1. Sentong lapokba : Kupza Watsü Telen
2. Sarasademtsü : Wt. Atola, Associate Pastor Women (Artang)
3. Tajungshi O : Wb. Limawabang Jamir, Deputy Commissioner, Mkg
4. Watsü wadang : Tir Ongpangkong Mungdang
5. Ken ka : Mungdang Choir
6. Tepela O : Tir Watsü Mungdang
7. Ni ya shiner : Tir OKM
8. Temeja ken : Ungma Watsü Telen
9. Onük : "Putusen den jangyu medem"
10. Tatem sarasadem : Wt. Imtisena (Chumukedima)

LOKTI CHIYONG

Sentong II
1. Sarasademtsü : Wt. Imdangtila (Mangmetong)
2. Osangtem agitsü a) Tongti zülur osang
b) Audit osang
c) Nungtet luden osang
d) Report committee osang
e) Temzüng yanglushiba Committee osang
f) O lemtep
3. Mungdang tezülula Osang
4. Menden melentepba : Wt. Z. Alemsonla (Longsa)
5. Menden tatem O :
6. Mungdang shipangba : Mekuli Watsü Telen
7. Tatem sarasadem : Wt. Imlimongla (Longmisa)

TEMETETSÜ

1. Mungdangi arur ajaki pei sasa tanendak anepalutsü.
2. Mungdangi arur shia tenüng züluk (Registration) Rs. 20/- alitsü.
3. 19th March 2021 anepdang sentong nung OWM atema tenla sarutsü.
4. Mungdang choir Alibatsü Telongjem Mokokchung Town.
5. Mungdang timsür Khensa Kaketshir Telongjem Mokokchung Town.
6. Onük jembir 25 minutes aser tanüngba tejembir shia 7 minutes agitsü.
7. Aotsür sobutsü tabensa meraketa sobur mungdangi arudaktsüner.
8. Tentet shia pei wako 18th March 2021 anepdng 11:00 am tashi nung Town Hall tongjang.
9. 17 Buba Ongpangkong Watsü Mungdang nung atentsü Ongpangkong Watsü Wabong ajak pelashishia jaoker.
10. Iba sentong takok angutsü asoshi ajaki sarasadema atatsü ayongzüker.

GOVERNMENT OF NAGALAND DIRECTORATE OF HEALTH & FAMILY WELFARE NAGALAND :: KOHIMA

No. DHFW-5/Trg/PG (Dental)/2008-09/ / Dated, Kohima the th March'2021.
ADVERTISEMENT

Applications are invited for in-service sponsored candidate(s) from Nagaland for undergoing 3 (three) years Post- Graduate course in MDS "Oral & Maxillofacial Surgery" for the academic session 2021-22 at Regional Dental College, Guwahati.

-Criteria:

1. Candidates should be domicile of the State.
2. Candidate should be qualified in the NEET-MDS-2021.
3. If the 1st Candidate refuses to join the course for any reason, he/she should surrender the seat in writing. In that case, the offer of the seat will go to the next waiting list candidate.
4. No. of seat - 1 (one).

Interested candidates may apply to the undersigned, DHFW-5(Room no.210), by 16th& 17thMarch'2021.

SD/- DR. KEVICHUSA MEDIKHRU
Principal Director
Dte. Of Health & Family Welfare,
Nagaland: Kohima.



Los Angeles nung 63 buba Grammy Awards indang red carpet nung Comedian-YouTuber Lilly Singh-i "I Stand With Farmers" zülua aliba mask enoker adenba noksa nung angur. Lilly Singh-i India nung aluyimertemi lungkak aitba pusema nungiter aser iba atema jembia arur aser red carpet/award show noksatem kanga nüngtugu süa prokshiba atema lai iba mask enoker aden ta metetdaktsüogo.

Ungma yimda 'Spring Badminton Championship' asayar



AMAM President, Imkongmar-i Ungma yimda 'Spring Badminton Championship' tenzüksüba mapang tangokba noksa angur. Mokochung, March 15, 2021.

Mokochung, March 15 (TYO): Adventure and Motorsports Association Mokochung (AMAM) president, Imkongmar-i March 15 aonung 'Spring Badminton Championship' yangi Bapu Tzüpu Amphitheatre Ungma nung meraketa tenzüksüogo. Iba asayamung ya Mokochung

District Badminton Association akhüm kübok Soyim Shuttlers-i ayongzük. Mokochung town aser temeket yimtsüngtem balala nungi arua shilem agidaki.

Tetushi tesemdang, Imkongmari mapang tatsüka jembidang, yimtsüng ka nung stadium tajung yanglua iba ama district level badminton

tournament ayongtetba asoshi Soyim Shuttlers dang pelaba den iba asayamung ajanga lenla aisü nung tajangzüksü bener arutsü imlar, ta ashi.

Tsüngremi nisung shia nem sempet balala moaja lir, anungji, iba sempetji meteta aser taküm liteta aotsübaji kanga tongtibang aser saisapong ka ama libalirutsü asoshi pai tayongzükba ka agütsü.

Iba asayamung nung asaya telemsa tapu asem; men's doubles, 35+ men's doubles aser 45+ men's double lir. Iba asayamung ya March 17 tashi asayatsü. Sentong nung Ungma Village Council Secretary aser Mokochung District Badminton Association (MDBA) president nati tajungshi o tulu bener arua tesentepertem ayongzükba jembidi.

1buba Naga style category wrestling asayamung ayonger

Kohima, Metsüremi/March 15 (TYO): March 23 nungi 27 tashi Thenyizu yimtsüng nung 36buba meet den 1buba Naga style category wrestling asayamung ayongzükba asayatsü Phek District Sports Association (PDSA) renema lir. Iba asayamung ya Chokri Area Games & Sports Association-i achaayanga asayatsü.

Asayamung lapokba sentong nung Nagaland deputy chief Minister Y. Patton tetushi tesemdang aser planning & coordination, land revenue and parliamentary affairs minister Neiba Kronu mejeta jaoker asütsü.

PDSA tir Nezosa Tetseo-i ashiba agi, mezügbuba Naga-style category Wrestling (tebur) asaya ya tang mezügbuba PDSA meet nung benoka asayatsü, koba 65 kg tekübok; 74 kg tekübok aser 86 kg ta shilem asem küma lemsar asayatsü.

Iba dak alia tetsür aser tebur naprongla Football, Basketball aser Volleyball asayatsü aser ano tetsür aser teburtem 100 metre; 200 metre; 400 metre; 800 metre; 1500 metre aser 4x200 metre asemteptsü aser Discuss throw; Javelin Throw; Shot put; Long Jump aser High Jump amala field events tema

asayatsü.

Kasa mapang nung PDSA-i, March 22 nü nikongtsütsü 4:00 nungi tenzükba business hour ka akatsü sentong aliba metetdaksüogo. Asayamung nung alakteta jokertem rongnung Neposo Theluo, commissioner & secretary rural development, Wezope Kenye, secretary health & family welfare, Dr. Kevichiisa Medikhrü, principal director health & family welfare aser Razouvolie Dozo, deputy commissioner, Phek nunger densema lir.

Maneni sponsor aser tenla agütsürtem ronung Track suit-Zhothisa Dawhuo- director state lotteries, printing and stationery- Kudecho Khamo, chairman EDA, medals- Veyielo Doulo, deputy director tourism, walkie talkie- Er. Vekurhu Venyo, EE RD aser football (Lt. Vedai Nienu Trophy) Lt. Vedai Nienu'er kibong nunger densema lir.

Hukhonieyi Soho chief referee ser athletc asayatsü, football Colo Mero-i achaayangtsü, Volleyball Tsibu Khesoh-i achaayangtsü, basketball Surhoneyi Soho-i achaayangtsü aser wrestling Vekhriyi Chuzho-i achaayanga asayatsü.

2nd Mkg Town Inter-Ward Football asayamung osang

Mokochung, March 15 (TYO): Youth Association Marepkong-i ayongzükba March 9 nungi Imkongmeren Sports Complex nung tanabuba Mokochung Town Inter-Ward Football Tournament asayadaki aser March 15 nü tatemsabuba league match asayaogo.

Taküm iba asayamung nung Mokochung Town kübok Ward 16-i shilem agia liasü. Item rongnung quarter final-i aitemji; Pool 'A' nungi Winner – Mongsenbai Ward aser Runner – Arkong Ward, Pool 'B' nungi Winner- Artang Ward aser Runner – Majakong Ward, Pool 'C' nung Winner - Penli Ward aser Runner- Alempang Ward, Pool 'D' nung Winner - Tongdentsüyong Ward aser Runner – Sungkome ward.

March 15 tatembang league match mezüng asaya Artang o Sangtemla na asayaba Artang-i goal 1-0 agi akok, tanabuba nung Alempang o Lijaba Lijen

na asayaba Alempang-i goal 1-0 agi akok. Tasembuba match nung Majakong Ward-i Aongza madak goal 3-0 aser pezübuba match nung Penli Ward-i Marepkong pur goal 1-0 agi koka liasü.

Quarter Final Match yamai alitsü:

Quarter Final Match yamai alitsü:

16-03-2021 1ST QUARTER : Mongsenbai Ward Vs Sungkome Ward @ 1:00 PM

2ND QUARTER : Penli Ward Vs Majakong Ward @ 2:30 PM

17/03/2021 3RD QUARTER : Tongdentsüyong Ward Vs Arkong Ward @ 1:00 PM

4TH QUARTER : Artang Ward Vs Alempang Ward @ 2:30 PM



Majakong Ward aser Aongza Ward na tsüngda asayaba mapang tangokba noksa nung angur. Mokochung, March 15, 2021 (Noksa Agir: Imnawabang Jamir)

Tokyo Olympics Torch Relay terpranger medeni tenzüksü

Metsüremi/March 15, 2021 (Agencies): Tokyo Olympics torch relay sentong reprangtsü atema nüburtem marudaksütsü, ta asayamung ayongertemi Hombarnü sangdongogo.

Taruba hopta torch relay tenzükba sentong aser linük ajunga sema senzuba rally mezügbuba shilem nung shilem magitsü atema fan tem dang shiogo, koba coronavirus wara poktetba ajanga Olympics küm ka thinentsüsa akümba sülen tenzükshitsü sentong yanglur lir.

"Torch relay tenzükba sentong aser Fukushima torch relay mezügbuba shilem nung shilem agitsü atema nüburtem marudaksütsü," ta asayamung ayongertemi ashiba den sentong

ajak online nung live sayutsü ta metetdaksüogo.

Olympics asaya reprangtsü atema bendanger fan tem anioktsü manioktsü asoshi telemtetba ka magitsü tsüngda tang iba osang sangdongogo aser iba telemtetba ya March 25 nü torch relay metenzük tsüngda agitsü imlar.

Taoba hopta osang balala ajanga ashiba agi, Japan sorkari bendanger fan tem linüki marudaksütsü kechiyong tashidak tali menatpa aotsü ta tsübua bilemer.

Torch relay ya Fukushima prefecture nung tenzüksü, kong taoba hopta 2011 küm menoknok, tsunami aser nuclear timtem ajanga nisung 18,500 asüba mesera samara

küm 10 ajungba bilemteta mungogo.

Ajisüaka tamalen sentong yanglur aliba ama masü July 23 nü Olympic lapokba sentong matong tashi tesem balala nung milenbong bener senzuba sentong takok tashi ajemshir agitsü.

"Covid-19 tashidak prokshia aoba nokdangtsü atema Tokyo nungi iba tesemi aoertem tajemba kümdaksüogo," ta asayamung ayongertemi ashi.

Parnokisa, "sentong tongmelang ka dang agitsü aser sentong nung shilem agitsüpurtem dena ajemshitsüogo," ta ashi.

Rally lapokba sentong nung nisung 3,000 shi bo adentsü imlaa liasü.

Carolina Marin All England Championships nung masayatsü

Metsüremi/March 15, 2021 (Agencies): Carolina Marin-i la All England Championships nung masayatsü ta sangdongogo, koba Bodhbarnü Birmingham nung tenzüksü. Olympic champion yagi Deobarnü ashiba agi, la yiruba ajanga asayamung nung shilem magitsü atema telemtetba agi.


"Tia maka ni taruba hopta All England asayamung nung shilem magitetsü, kechiyong ni Swiss Open asayaba mapang yirua liasü. Ajisüaka ni yakta meyipa arutsü," ta Marin-i tweet asü.

All England Championships nung Marin ya top seed asayar liasü.

"Ni aser ozü team-i, Swiss Open mapa yiruba anepalu tajungba asütsü ta bilemer," ta Marin-i ashiba TOI sangdong ka ajanga metetdaksü.

Marin-i taoba hopta final asaya nung India tsür PV Sindhu koka liasü.

"All England asayamung ya Olympic qualification nung



shilem ka masü asünung ni yirur aliba kanga junga anepaluner," ta Marin-i shisem.

Marin asayamung nung shilem magiba ajanga Sindhu nem lenmang lapoktsüogo. Sindhu, Marin den semifinal nung ajuruteptsü liasü aser quarters nung lia Japan tsür Akane Yamaguchi kokra la semi final nung Ratchanok Intanon, Saina Nehwal mesera Nozomi Okhura den ajuruteptsü.

Chinese Taipei World No.1 Tai Tzu Ying-a All England Championships nung shilem magitsü aser China nungertema iba asayamung nung shilem magitsü telemtetba agiogo.

BILEMDANGANG

"Ochi nungi masetshi-i nokdaktetang."